



*Iacob rencontre Esäü , duquel l'animosité fut adoucie , tant par humilité , que par presens à luy faits.*



PRES que Iacob fut party de Mesopotamie , & eut accordé avec Laban , en retournant en la terre de promesse , les Anges de Dieu alloient au deuant de luy , & quand il les vid , il les nomma l'armée de Dieu . Et redoutant la fureur d'Esäü , enuoya messagers vers luy , disans , Qu'il desiroit estre en sa bonne grace . Et les messagers de retour rapportèrent , qu'il venoit au deuant de luy avec quatre cens hommes ; dont Iacob craignit , & diuisa ses troupeaux en deux bandes , & pria Dieu luy estre deffenseur contre son frere Esäü , à ce qu'il n'offençast les meres ny les enfans . Il enuoya de grands presens à Esäü , pour captiuer sa bien-veillance . Puis ayant fait passer le gué de Iacob à ses femmes , enfans & chambrières , estant demeuré seul , l'Ange luita contre luy iusques au matin . L'Ange le nomma ISRAËL , pour auoir luité contre Dieu & contre les hommes , & auoir vaincu . Or Iacob poursuiuant son chemin rencontra Esäü , qui auoit adoucy sa fureur , lequel le vint embrasser & baiser , & se departirent bons amis . Et Iacob paruint en Salem , & habita auprès la Ville , & ayant dressé vn Autel inuoca le puissant Dieu d'Israël .